

PRÆFATIO.

De quibus scriptores hæresion; & Irenæus lib. 2. contra hæreses cap. 19. Tertullianus lib. de præscript. cap. 7. Ut jam non dicam de Origene, Iustino Martyre, &c. theologis scholasticis, de quibus nos 1. part. select. disp. tit. de theologia scholastica. Tertullianus in lib de Anima cap. 23. ait, *Platonem omnium hæreticorum condimentarium factum.* Ut vel hinc videas quâ historiæ philosophicæ & ecclesiasticæ cognitione non nemo ex Soli-ipsorum & imaginariæ Pansophiæ familia philosophos (Coloss. 2. vers. 8.) interpretatus sit peripateticos; quippe quorum philosophia tunc in scholis regnabat. In quâ quæso Utopia, bone vir? In Græcia, in Syria, in Latio, in Iudæa? Longè aliter Melanthon, aliique commentatores ad locum cit. Et vel lectio istius capituli, & notæ marginales Belgicæ satis ostendunt, intelligi philosophos Platonicos, Iudæorum Essæorum magistros. Vide scriptores de Sectis Iudæorum. Enthusiasticis superioris sæculi, & fratribus rosæ crucis hujus sæculi, ut & Weigelianis (quos Altingius loco cit. adjungit Enthusiasticis & fratribus Rosæ crucis) & Werdenhagen Paracelsico-Libertino-Enthusiasticæ, hac in parte affines sunt, hodierni aliqui soli-ipsi, qui communem & receptam in scholis Christianis philosophiam repudiant, Logicam etiam, & Metaphysicam vulgarem inutilem proclamant: ad quas ipsorum molitiones vastitatem, barbariem, schismata in scholis, & postea in ecclesiis ac politiis secutura (nisi Deus avertat) non vanè metuendum est. Quid sibi velit,